

Pu'eman Inacha'igen, 2022  
Tinige' Teresita C. Flores  
Nubembre diha 11, 2021

Gi AgonIna'atotchē, Hinahatsa yan Hinehemlo'  
Tinige'  
Sĩñora Teresita Concepcion Flores

I Fino' CHamoru gi hinasso yan i tinayuyot para i tiempon  
i agon ina'atotchē, hinahatsa  
yan hinehemlo'

Måtto, ti ta nanangga, ti ta lili'e' lao måtto,  
maseha ti manlisto hit, ginen este, ha na' fanlisto hit,  
ya puedi ha' u fåtto i ha'ani annai ta fanhita mo'na.  
I ha'änen dinanña'. Mungnga na ta fanakontra, ta fanunu  
gi espiritu, kurason, guinaiya yan minaolek para todū.

Maila ta hassuyi. Sa' para u fåtto i tiempo, hunggan! i tiempon  
agon ina'atotchē annai ta fanasodda' ta'lo. Ta fanago'te kånnai,  
ta fanatoktok, ta fanguentos, måtta asta måtta, tataotao asta tataotao  
kurason asta kurason put minagof, respetu yan inafa'maolek. Meggai  
minaså'pet lao este i pettan i diniseha, i pinadesi.

Ta fanmataknga, ta fanachu ya ta fandanña', i chinatsaga ta na'gefsaga,  
i minalångu ta na' guaha hinemlo'. Maila ta fanhita, mungnga na ta atan ha'  
i maloffan, i hagas i lina'la' lao nihi ta mantieni hihot gi kurason-ta i mamamaila'.  
Ta fāna' mo'na para minaolek yan hinemlo'. Ya u dokko' i isa ya u mali'e' na yanggen  
guaha inangokko, guaha hinengge, yan guaha hinengge guaha diniseha.

Kulan i hinemhom i tatalo'puengi, sin kåndet ti klåru i hinanao  
Ti ayikon i chalan siha nu para u ta chule', para ta tattiyi. Puru trinesti,  
linihan yan pinadesi. Lao u manana ta'lo, ya u ma'lakña ki i kinahulo' åtdao  
gi na'åu na talo'åni. U guaha agon hinahatsa gi espiritu, hinengge  
yan inaguaiya entre todū i taotao.

Ya i agon hinehemlo', put fin! u fåtto gi tataotao, yan gi salut hinasso. U tinåmpe  
i tano' yan i taotao siha taiguihi i mapagåhes gi langet yan tinampe i sabåna  
i tasi yan i tinanom siha. U dokko' i isa para todū u mali'e' na yanggen guaha  
inangokko, guaha hinengge, ya yanggen guaha hinengge guaha diniseha, gi agon  
ina'atotchē, hinahatsa yan hinehemlo'.